

摘藻堂四庫全書薈要

集部

欽定四庫全書薈要

集部

元詩選初集卷二十九



詳校官候選知縣臣吳國華

欽定四庫全書薈要卷二萬三百八十九

集部

元詩選初集卷二十九

長洲

顧嗣立

編

范梈德機集下

社日

雨止散青煙
白叟相違已隔年
忽遣大兒三角結
打門來覓社神錢

五月二十六夜宿松林蘭若

白沙寨下接飛霞
行至招提日已斜
睡覺忽聞山寨語

不知今夕離吾家

發湖口

已過匡廬却向西
片帆猶逐暮雲迷
路長正是思親節
取次驚猿莫浪啼

潯陽

露下天高灘月明
行人西指武昌城
扁舟未到心先到
卧聽潯陽譙鼓聲

以瓊扇一握奉致黃明府

拾得炎州月一團殷勤持贈比琅玕情知已是秋風後
畱作明年九夏寒

鍾陵夜宿聞鐘

中年江海夢靈皇夜半聞鐘似上陽一百八聲猶未已
更兼雲外鴈啼霜

日晏

昨日相期早出邨今朝日晏未開門可人一夜東風雨
綠遍天街舊草痕

院中夜直

此身只似到南州
莎草寒雞一片秋
後夜玉堂誰上直
料應少睡更多愁

離揚州

孤篷如磨遶汀沙
葉滿平湖藕未花
回首竹西亭漸遠
一江煙雨酒旗斜

過三合驛

一春歸計又蹉跎
窮粵風光奈病何
總有青山千萬疊

行人長少鷓鴣多

江上古祠

老樹昂藏倚岸隈
祠靈經歲鎖蒼苔
豚蹄卮酒能多少

便一作但有羣鴉旦莫來

湖面

湖面春深煖氣勻
青蕪未隕一作損已知春沙灣
散駐張

魚客葦室時驚射鴈人

北山谷中老父

無多林屋冠青山長子成孫鬢未斑問我鄉園何處是
半生江海未知還

渡端州峽

櫂郎得便泝清流忽報舟前曉霧收蠻語酬人翻自苦
好山不敢問何州

正月二十四日至寶圭驛是北流縣自此遵陸
指鬱林矣

遠辭京闕碧雲端泝盡夷江未到官回鴈峰南更千里

是行誰爲報平安

得樟樹鎮便寄家書

商船夜說指江西欲托音書未忍題收拾鄉心都在紙
雨聲杜宇傍人啼

臨高阻雨

恐傾南海成秋雨急喚西風作晚涼淨掃黎山須見骨
莫令楚客屢回腸

安定縣

島上晴雲滅復生誰家吹笛海天明
縣堂曉起西風急
半是淡黎夜雨聲

至富屯

承恩千里出江鄉轉歷三關道路長
黃葉霧開山市集
見人鳬鴈憶橫塘

遊南臺閩粵王廟

海角釣龍人杳杳雲間待鴈路迢迢
若爲借得山頭石
每到高秋坐看潮

池館夜坐聽雨

更聲隨雨動譙門頗似聽泉宿
楚原客裏青燈如骨肉
獨能相待向黃昏

懷京下親友

海上經年思殺人絕憐京國舊交親
過江唯有傳柑使
寄得書回是莫春

寓書

欲寫鄉書寄故園行人已遠意空存
舉頭却見南來鴈

箇箇隨春度塞門

憶得

憶得佳人白紵詞
幾將天外數歸期
自從落盡庭前樹
夜夜秋聲總不知

贈郭判官

慈烏夜夜向人啼
幾度紗窗兔魄低
自有平安三百字
無因却寄大江西

卧病

朝來忽見樹藏霞
碧草春邊徑路斜
佳客不來春雨盡
山禽啄徧小桃花

清明日畱西山

離家六度見清明
知是何時出帝京
今日登臨倍惆悵
好山多似豫章城

西谷訪人不遇

出郭幽人晚未歸
青天咫尺見何稀
一年祇有春晴好
多事楊花學雪飛

春日上平坡寺

蘿逕陰陰近百層金輿記是昔人登山僧苦避尋詩者
牢閉柴門喚不應

彰義門送人還南城觀臺

郊原平晚綠萋萋獨上高臺意轉迷古樹鳴蟬城下路
送人長憶向安西

懷臨江寓居

石霜峰北淦西頭寄住林塘數畝幽比及到家猶是客

對人強自說鄉愁

清明日

旅庖欲禁自無煙
酒裏中原熟食天
不分小桃紅似火
爲人兒女照鞦韆

絕句

幽人不出戶長開
看盡春風長綠苔
多謝有情雙燕子
暫時飛去又飛來

題松雪圖

傍人不識歲寒松
憐殺溪山大雪封
待得化爲東海水
青天白日睡蒼龍

贈熊處士還山房

并序

廬山中有山房宋李尚書公擇藏書處今廢矣海
昏李氏爲其先作書堂於建昌州亦曰山房并祀
尚書焉蓋有慕廬山者矣聞熊修業是間故作此
記之

尚書舊隱在匡廬
亂後傳聞宅已墟
祠宇祇今誰薦鞠

鬼神猶自護遺書石泉宛宛輸池細川樹茫茫映日疎
不識海昏熊處士冥棲消息近何如

送馬掾遷湖南

聞君暫與故交違去逐西風落葉飛看劍未成今夕會
拏舟定復幾時歸雲開帝子黃陵廟月過將軍赤壁磯
事業還須各努力收名卽用繡爲衣

贈李宣使

故園雲卧四三年府署依然念子賢莫爲馳驅傷遠道

但將忠孝感皇天
湖南政譽聞爭薦
日下絳綸佇近傳
爲報津頭黃菊藥
明當照我上江船

四月十六日詣東華門奉迎香輿

天香曉報出宮城
已辦隅頭合樂迎
黃鳥低斜衝隊過
紫驕疎蕩著班行
百王盛祀無遺典
萬乘溪居有至情
失喜悵一作共傳湯沐賜禮官
識姓未知名

至夏莊懷平坡舊遊

平坡谷前桃花年
時著屐到君家
祇今可買惟邨酒

無復能來試石茶簾幙高高通紫燕溪流款款伏青蛇
同遊昨有虞公子却爲盧郎得浪誇

送梁知事之婺州

皓月青雲若箇邊送行恨不共吳船新官浙下皆名郡
舊宅山東有賜田禮樂固應張盛代簿書勿用歎流年
經時不見曹員外今日因君重惘然

追和盧修撰張平章園亭觀花飲

白藕花邊香已秋西郊風物野亭幽未須短杖扶持病

且遣孤尊斷送愁紫氣近連飛鳳闕青山遙隔釣魚舟
勝遊縱在招要外猶解因詩頌醉侯

秋日集詠奉和潘李二使君浦編修諸公八首
古薊城邊白露零秋聲不任旅人聽差差乳燕朝辭舍
歷歷高鴻莫過庭以病酬閒翻自惡將愁抵醉祇難醒
何人解擬匡廬賦千仞岡頭瀑瀉瓴

生也無涯死有涯拋書幾擬問南華要知立志非多事
但使成言自一家寒樹接天霜映鵲溼蕪滿地雨生蛙

相過儻遂攜尊酒檢按牆東野菊花

迴無江左管夷吾誰復能稱晉宋書
運本關天聊爾耳力能蓋世復奚歟
百年草草雲龍地四海悠悠法象廬
曾向鍾山酌芳草至今心死及菑畬

流落移家白帝都低頭媿盡馬相如
題橋一字終何益

一作補賣賦千金竟或無風月長畱前輩詠
塵沙滿載古

人書此身泛寄空江上已異當時舊鬢鬚

潘公牆角樹連庭曾是笙簧晝夜聽
門巷祇今埋糞壤

輪蹄自昔走雷霆長因午睡思茶竈却爲朝吟款竹局
若續濟南名士錄莫令憔悴鵲湖亭

李侯高朗若空晴議論詩書滿腹撐期接仙舟應少便
偶分宮硯亦多情蠻荒異俗中年歷河漢頻秋向夕傾
此去暫煩南郡守旌旄勿用野人驚

浦君高價本璠璣多幸蒹葭得所於學道初輕千里驥
收功直到九州魚詩揆飯顆尤難測賦擬蘭陵定不虛
月月西垣更夜直還應共我惜居諸

秋入江山錦繡開白雲紅葉盡詩才句成底用三年得
槎在應須八月回自是每爲浮客累非關不受故人催
憑將寄語詞林老風雨重陽又近來

送白无咎太守之郡

瀟灑中書舊省郎排雲曾攬舜衣裳一麾况復守名郡
萬事不如歸故鄉馬首漸違燕闕雨鴈聲欲度晉城霜
漢廷擇相皆良吏蚤奉潘輿謁建章

奉同陳應奉訪友人不遇

翰林小暇出西城京國餘秋晚更明鷗度折磯心已熟
馬逢危石眼偏生疾風稍定樓臺色微照猶含鼓角聲
會合何因得惆悵潛夫抵媿未潛名

寄別倪大同

知君久住玉真壇日與飛仙弄紫環從此便令行地縮
逢誰不說上天難鶴邊紅日浮觴送馬首青山抱檄看
相好何因不相別寄詩應到莫雲端

將赴雷陽送羅提舉之任廣東

松滋暫泊薊門船復指番陽

一作禹

路幾千茉莉香溪和

酒露枕椰葉暗煮鹽煙齊人舊算無遺策漢史新藏有

賸錢莫爲遐荒心力怠珠

一作朱

崖更在海南邊

休日出郊

歇馬高林煙霧開感今懷古獨登臺遷臣逐客皆前輩
幕長郎官盡上才放浪已聞窮九域飛騰終合近三台
謝公自有青雲履且與從容步紫苔

寄友人

繡衣行部直南州幕府英名蚤歲收如此一臺兼二妙
令人萬里破千愁桺葉暗潮聲莫辟荔花懸岳影秋
此去三湘寧久住近天須應重書求

題黃隱君秋江釣月圖

舊識先生隱者流偶因圖畫想滄洲斷雲滿路碧窗晚
明月何年青嶂秋世故風塵雙短屐生涯天地一扁舟
何由白石空磯畔招得人間萬戶侯

寄上甘肅吳右丞

塞上孤鷹白雪毛塞門風物靜蕭騷黃河西去從天下
泰華東來拔地高枸杞莫將如意改醍醐足飲勝蒲萄
遙瞻圭袞還朝日正屬江湖心緒勞

九月十九日京東門與董右軍諸公別至通州

還寄在京朋遊

一作舊

臨分強顏作笑言上馬慟哭投煙邨十年總仗舊交力

萬里獨懷明主恩南極下頭星象少東風近便處一作柳

梅繁時人祇怪丹砂令

一作冷

曾以虛名細討論

山齋

山齋朝雨竹光勻
茶竈催添石火新
對語黃鸝真不俗
飛來白鷺淨無鄰
辭榮豈敢要時論
賞靜猶應愧古人
報道林河春漲起
少須重理舊絲綸

傳之經歷謁告還湘中
未語別而宵征翌日與
僚友追送生居亭中二首

美人歸思落滄波
昨者論心肯重過
寒盡極知春意在
夜深無奈月明何
海隅雖暫違霜幕
天上應須接玉珂

如此才賢移病去瘴煙端的爲誰多

北風盡日破南溟行路經年倚壽星子自全家依翠岳
我猶萬里隔青冥山田鹿下投書去水館猿啼却坐聽
王事馳驅知有素何由重見此郵亭

十月九日詣天光門上進三朝實錄

儀鸞簇仗滿雲端玉鑰初開衆樂攢三后龍光周典冊
羣臣鵠立漢衣冠爐香著日浮晴靄宮樹班霜試曉寒
千騎前頭都不避

一作見

祗傳學士拜金鑾

歸來

十載歸來問草堂入門喜見葛山蒼
慈親已慰占烏鵲
穉子行堪詠鳳凰
新理園池幾瓶物
小移松柏且分行
卜居未是居難卜爲恐傍人議一作笑楚狂

辛酉歲元日

延祐七年三月英宗卽位是歲改至治元年

西山千仞鬱崔嵬山下樓臺紫翠開
玉帛會同來萬國
璣衡懸運屬三台
嘗聞海客談金鼎
更見祠官進玉杯
慚愧詞臣今白首久無賦頌獻蓬萊

曾教授赴韶州

荔子紅邊五月初廣文去住定何如報恩豈戀將軍馬
治盜聊迂太守車多近藤蘿安吏舍少憑椒葛附音書
到官定有佳聲薦瘴雨蠻煙細祓除

靖海縣

海縣春溪沙氣暄居人生事不離邨上梯取斧料桑尾
抽櫂移舟繫柳根已過清明違帝里不妨紅白徧江園
持盃試與酬風物溪媿樊遲學圃言

百丈春日紀懷

東風久不到新堂生意雖微未卒荒
草上葫荽偏挺特
花閒蘆葍故高長
時來豈盡栽培力
物化須知長養方
葵藿有心終莫奪
每聞支笏照滄浪

寄題集賢周司直悠然閣

番陽東下萬山圍
魁閣崢嶸面翠微
雲接大荒迴古色
波涵落木動晴暉
宦情靜與游魚逝
詩思長隨夕鳥飛
久待倚闌成獨酌
癡兒了事各須歸

歸思

陶公歸思定如何山郭春風長薜蘿
直道當官惟任拙庸才負祿祗慚多
江山實自辭家隔日月虛隨閉戶過
點點飛鴻向天末憂端不類澤中歌

風止聞鵲

荒山遠水放輕舸頓雨顛風戒敝袍
五六月餘鄉問絕二千里外客心勞
樹間烏鵲聲頻好天上麒麟格自高
獨有武夷看未了野人寄語壓香醪

奉和王繼學懷濟南舊游四首

前輩風流逐斷澌濟南舊錄故人詩遙知靈運初游日
正是元方後載時青社寥寥成異物丹丘鼎鼎屬遐思
壯年易動離居感繾綣花前金屈卮

樓上看山翠黛浮樓前沽酒錦纏頭登臨試與詢湖鴈
豪傑親曾侶海鷗沙嶺曉晴雲散出野亭春盡水交流
意中故舊那能得強擬偷生賦遠遊

每愁大手不如燕多見公侯勝昔年計拙欲求千戶等

心勞正類十洲仙幾回見月思歸去暫到臨風復惘然
翦盡綠楊三萬樹多因無處著啼鵲

手接新詞絕底清一雙白眼爲君青寰區政待新年穀
江漢徒傳赤日萍斷雨潛蛟虛水榭遠波迴鷺實雲汀
此情可在齊州外不解無人問獨醒

上真應寺觀寺後龍湫湫在厓上蓋由寺北下
馬竝高數十折得之又數步許得巨石有僧龕
其中云卽唐盧叟所隱成道處時日斜方焚香

誦經聞客至乃輟誦相迎作茶云

憑高窈窕辨精藍濯佩還思訪古潭字扁孟家題處碣

洞畱盧叟去時龕近人野鳥如曾識問客山精不敢談

聞說平坡猶在上登臨雖倦且停驂

德機本集至元間臨川葛仲穆所編

已下又從清江楊聲刻本及諸家選本所見錄入

節婦王氏

妾年甫二三始識月團團十二學女工刺繡如鴛鴦十

九嫁夫家事姑施衿輦夫壻良家兒世籍為王官雖聯

朱紫貴不習綺與紈過庭執詩禮開口若驚湍風儀在
一時爭作玉人看天地忽降毒摧折青琅玕回首四十
春景光若流九貞心守松柏芳性軼芝蘭落月簾帷曙
西風機杼寒沈思往昔事淚下紅闌干豪客至茅屋舉
家竄林巒入房衛病姑身犯白刃攢相向義憐釋視死
色無難親知為歎息保社為辛酸欲與上州府為妾旌
門闌妾實無所願所願在所安婦人徃從人阿母涕洟
瀾送行遺之語敬順無違歡匹偶固有時寧知憂患端

辛苦蹈物變豈羨身獨完殷勤謝舊故聞者摧肺肝

重五日至西峽渡解后閩帥王侯盛稱山川之
壯余謂可以爲知矣亦復有賦渡近方山之下
繫馬西峽間朝曦射厓赤城中見方山江上成亂石緣
流感重險攬勢得鉅敵不有歌詠懷徒困馳驟役因之
竊歎欵美哉此歎息尊醕清屢注盤荔朱新摘紛厖異
方俗卓犖同門客去去無久畱薰風蕩蕩南國

袁州謁韓祠已宜春臺晚眺

乘月泛脩渚凌晨訪崇臺曾覺匝地起疊觀凌雲開時
須炎夏首斗柄從南迴四周翠巘出六合清風來王明
猶日月憲令若風雷惠澤綠郊樹陳蹤蒼澗苔鼓鐘代
寂寞輪軫路徘徊聞茲守郡者自昔何雄哉百鳥見孤
鳳衆星麗三台吏負鈞石寄法已豪分該云胡答臨眺
遠揖謝英才

樂會縣

早發端趙邨莫投樂會縣縣阻道路長但見水蔥蒨輕

風掠溪縻好月觸石面前行日已分後從氣猶眩役者

向我言前年土豪變黃旗伐畫鼓樵屋擬牙殿居民絕
煙爨搬併入淮甸却又遭劫殺流動靡安奠羣夸盡蜂
起盡用血洗箭公然肆悖暴請與官軍戰官軍幸努力
摧落得淡便雖獲覆其巢姦愚不勝譴于今郊原間芳
草白骨徧我行適夜分聽此毛髮旋前罔明炬火叫應
欣蹂踐官吏候我來始與人相見沿河島汴溪問路山
田轉啾啾烏鳥鳴靡靡鞍馬倦一從違京國幾度夢霜

霰何所非異鄉開懷謝身健

奉寄翰林鄧侍講

曩承持節江之東騎驢再上蓬萊宮蓬萊仙人歌白鶴
聲落五湖煙雨中世間爵祿不易致何獨去就如飄風
朝廷禮樂須制作六經隱義資發蒙論思廟堂集耆碩
啟沃寧讓前諸公閉門讀書古都市四輩冠蓋方隆隆
我生生長在窮谷那有文字爭人雄謬蒙引譽百僚上
負祿府署慚無功一別十年還又五昔者少壯今成翁

誰知復客七閩下隔二千里來詩筒羸軀頓醒瘴厲惡
賴以慰此心忉忉粵王城南浪自白粵王城西花正紅

凌雲篇

往與凌雲山人披虎豹謁太清是時東風滿瑤京綠楊
三月聽流鶯君隨挂席湘江行予亦騎馬趨承明手把
宮袍厭縛身却憶南溟有縱鱗四年辭海岳一舉上星
辰逢君却向凌雲下心上經綸甚瀟灑半夜清猿四合
啼長松古月照迴溪桃花源上路一去意都迷我本凌

雲峰畔客何日相從卜其宅早服還丹生羽翼共脫朝
衣挂青壁

萬竹亭

誰能買山種萬竹殘年請老住巴蜀結亭更在竹中間
四面雲谿寫山麓風敲最覺夜眠清雨洗勝延秋望綠
日吟不限三千字日飲定須過百斛隴西仙翁持斧客
散馬涼城行新菊為言令弟隱滄江如此風流天下獨
乃家正在蠶茨野束束琅玕繞茅屋方知白眼待時人

箕踞科頭自為俗是邦子雲劇博雅閉門草玄食漢祿
多緣未識此君心往事微瑕傷白玉使君自是廊廟具
方駕前修詎為辱平生抱負勁直節日莫天寒照空谷
始我瞻望望不及終我歎嗟嗟不足乞官儻或從西遊
向子亭邊祝黃鵠

贈別清夫還吳

新雨不作泥鉤輈樹上啼征夫懷遠路家在太湖西別
家今幾度楊柳江邊樹念鄉車輪下漸是中年路萬事

中年尚可期人生且莫長別離長別離向何方九江落
花清浦香王睢斑斑鳬乳黃南望不見三高堂奈何游
子思故鄉我家諸公濟時早功成身退合天道當時未
必知者賢挽不廻之卧煙島後來閱盡虧成事始識從
之去時好我不能赤手縛虹霓又不能委身同草木生
逢堯舜世肯受泥塗辱昨者誤奮龍門雷螻蛄嘲之自
云足憂來舉觴酹白日唯有皇天照空谷張公子吳江
生我有千載意不羨身後名為君寫作贈行曲曲中鏗

憂難為明君行不聽我意平明日買船棹秋聲亦欲東
下窺蓬瀛飄然此去白玉京須卿禹穴來相迎相迎未
見須相待客行雖遲心未改

卽事

隨地居能勝因人景倍饒折風疏菡萏移雨近芭蕉放
浪明高蹈畱連近久要虛心待世慮已任過雲飄

蘇李會合圖

未識沙場苦空曾奉使來詎知羝乳約不抵鴈書迴漢

節風霜古胡笳旦莫哀誰憐太史令心為故人摧

六月初十夜雨止玩月有感

雨歇青林迴虛齋生夕涼簾帷方度月枕簟已懷霜地
角家何在雲端路轉長慈帷近安否歸覲不能忘

王武子相馬圖

偶然來廐吏喚作九方皋毀譽依名立周旋逐物勞神
馳風電足眼冷雪霜毛事有遭逢者騏驎固自高

八月十五夜

城上初聞柝，天邊獨倚樓。
可憐今夜月，還照異鄉秋。
燭暗頻移席，簾虛不上鉤。
回文錦機字，寫得大刀頭。

風雨

風雨忽如此，空山方晝眠。
故應為計拙，可復要人憐。
燈火鄉邨路，桑麻杜曲田。
悠悠今視昔，把卷一茫然。

贈別南劍李使君三十韻

北戶羣山表，南雲九域西。
君今行欲徧，此意別都迷。
妙

句人誰識前年手，自題

李以烏蘇宣慰同知改吏部侍郎使交趾有南征詩一律絕

崖鈎象譯懸徑摘烏栖炎隩通冠冕邊陲重壁圭禮新
尊璽節名故籍金閨勞有恩言切歸無寵數躋宸心端
外見廟誼肯中稽望譽騰青瑣輝光拂紫泥旌麾深假
借民社載扶攜猛氣排蒼鵠幽思啓碧雞動應多愜會
行豈強扳提阜蓋喧童穉黃堂拜耄倪天機馴虎兕帝
力及鳬鷺越厲冬淡少閩煙晚向淒野人封水竹郡吏
接山谿汊碧荷香弱坡紅木實齊九秋鵬鶚翮萬里驕
驍蹄導從羅弓矢登臨按鼓輦少須青玉案與報白銅

韞忠信先蠻貊文章協璧奎孰云當近服不遂慰烝黎
執手關河早論文歲月睽物華盈眼亂春色傍人低謝
豹空洲隱王鳩遠樹啼國容方整整旅病轉悽悽謬忝
詞垣密微能官秩卑從班窺遂霸浪漫笑山嵇何日同
樽酒因風獨杖藜延平寶劒氣旦旦候虹霓

寄甄氏訪山亭二十二韻

問子亭何許漳沱舊水頭谷陵千載異風物四時幽城
郭長無事琴尊或此游窗攄平野秀戶接亂泉流猿鳥

相賓送漁樵互獻酬太行晴日近碣石晚煙稠莽莽青
天外離離碧海陬都將神迹化只可笑談求大檻花周
映虛階葉竟抽豈容黃壤汙祗為白雲畱更就諸峰老
寧須萬戶侯心知嗜好酷勢肯去來休予亦尋山者人
疑避世儔偶然依紫闕不是謝丹丘薄與江湖遠頻嗟
歲月周夢嘗經五嶽思屢繞三洲室宇憑誰寄園林誓
自收把書消旦莫種藥引春秋地僻澄官冗天空掃旅
愁幾時攜古劒萬里覓扁舟賸想高人趣空懷賤子羞

猶勝徐市俗瀛島計悠悠

曉山謠贈別金陵陳處士

昔我望天岳于時春正深雞鳴九州陌鶴警萬花林
旭日騰重海宵霞映別岑露條承蹀躞雪澗瀉嵌崱馬足
無由定鷺聲不可尋畏鐘牽逸覽挂笏繫虛襟每想丘
中趣如懸空外音十秋傷逝水千壑記捫參晚遇陳夫
子高談契夙心天形疏造化月眼識浮沈宦路悲懷玉
君門惜和琴豈因平旦氣薄示莫年箴但恐丹崖失何

愁素髮侵會當期絕嘯與爾鍊黃金

贈裴秀才

江邊見立春花老問征人物色隨鄉異風光逐候新朝
廷方貴士經術足謀身舉世皆騰踏如君獨隱淪鳴山
應鶯鶯在野淩麒麟已用遺經試寧辭累牘陳飄飄行
李別繾綣酒杯頻四海多英俊諸公自等倫雲霄開大
道溟漲接通津百轉倉庾近雙飛蛺蝶勻款畱俱蘊藉
歸到莫逡巡肯薄傳家賦猶堪博釣綸

贈別鄧修撰歸杭州

東風二月禁門鶯天上佳人有遠行惜路頻瞻霞上日
望家直到海邊城休須滿假辭三徑定約重來賦二京
回首津亭萬家柳初非憔悴獨關情

謝冷架閣春日東麓見懷

空谷白駒消息遲東風楊柳萬煙絲珮環憶為同心贈
書榜傳看俊手施曾以陋居追往昔却因嘉遯感今茲
相思恐涉山靈怪不遇仙人不記詩

送別周儀之推官赴錢塘并簡李四祕書

武帝龍飛第一春
京華相送各沾巾
詎知邂逅文身地
總是棲遲皓首人
山驛蛟眠星滿洞
水鄉鴈起月迷津
若逢李洞南天竺
為說前書感謝頻

送李祕書洞

祕書出自蓬萊苑
流落東吳又一春
見月定懷騎鶴侶
聞秋肯讓鱸膾人
吾曹事業徒溫飽
子等居諸異隱淪
海表何由攜手再
相憐同是老詞臣

寄題龔氏山園

居士名園何處求，無有是中風物幽。
巖花故解分藤綴，澗水新能合竹流。
綠幙黃簾圍玉樹，青天白日映朱樓。
醉吟自爾人難識，況是心輕萬戶侯。

五月二十日發雷州過徐文次驛候役者不至
畱二日

久約歸吳弄釣舟，海天羈思復悠悠。
誰知樹底春生月，獨坐人間地盡頭。
粉壁舊題分鮮讀，瓦罍新酒接花筍。

邊鴻固是南來絕絕為雷城信滯留

送元經歷赴廣東

番禺直北望長沙元帥持戈鎮海涯
萬里送君歸幕府幾時為我寄梅花
雲蒸巨浪魚吹岸柳壓荒山獠陣牙
欲托鄉書妨枉騎瀟湘西上是吾家

壽宮

武帝初行祀竈方祠官宮女儼分行
石闌井井通金殿金蓋童童出畫牆
但見擾龍呼作相未聞騎鶴拜為郎

祇今松柏緣原廟時接雲輶下大荒

贈陳提舉

便令回首綰青銀已負南宮第一人
文武既興殷士貢
申轅猶比漢儒真
離鴻苦事風霜急
伏驥深心道路親
若遇清溪尋舊隱
洗觴猶及艾陵春

和謝伯雨見惠之作

騷靈

一作靈均

逝矣不堪呼幾欲南遊訊楚巫
城郭煙濤垂

白帝星河風露浥黃姑
幽人徃恨九關豹佳士今猶千

里駒久客資君

一作政資

相慰藉可能無意謝飛鳬

蓮房

憶得花神一笑歡六郎家住小江干佳人怨等秋風近
穉子眠聽浦雨寒強為折來開戶牖誰將鎔出擬杯盤
少年太守思兄弟戢戢青頭莫漫看

畫馬

一自房星下渥洼龍媒多在玉皇家赤毛灑血微生汗
黑暈團雲整作花不待老能知失道固應來是涉流沙

如今豈少真神駿猶有丹青紙上誇

獨立

能詩不得靜中師又是天涯獨立時
高閣夕陽人影亂曲河新水棹聲遲
一身慷慨家仍遠十口淒涼歲薦饑
偶爾憑闌感風物臨流先被白鷗知

草堂

草堂不在萬山峰時有幽人步往蹤
雨壓牆煙籠薜荔石行渠水鑑芙蓉
清名豈讓陶貞白共住猶強陸士龍

忽憶鴈行天外去歸來期在粵城中

雨後坐郝大參亭子

每見人來問草堂偶從燕坐憶滄浪地形遠競朝霞爽
林氣清分宿雨香移石旋成行藥徑障泉思引釣魚航
他年紫綬歸黃閣几杖苔生儘不妨

公堂暇日

新起危樓接大荒海天奇觀壓殊方周牆恨未高千尺
猶見他家竹短長

將如靖安徐文學自新擘舟來候良有古意以
詩畱別

西風危棧逼青雲稍下臨江細路分問縣尚須窮日到
棹歌無計得畱君

懷京城諸公書崖州驛四首

甚憶清河元侍講送行猶有玉堂詩只今夜夜隴頭月
照見征人有所思

復憶濟南張吏部作詩文氣壓諸公佳兒亦是門生輩

尚想他年似若翁

繡衣御史果能文
蜀道新來有李君
記得京城黃菊爛
為余來覓董將軍

妙為文字吾雄甲
精切于今孰與儔
說著奉常虞博士
恨渠猶不見崖州

縣下鑿池種樹成
聚晨起視水深五寸而草樹
承夜雨後蒼翠鬱然可愛
戲題廳柱

檳榔池上芭蕉雨
更種垂楊十六株
中有玉堂蕭散吏

檢書正對輞川圖

至烏石郎舍二首

不見居人只見邨
離家茅屋又黃昏
面前滄海來無際
聞說占城對縣門

苦竹叢西石色烏
來時依舊驛亭孤
自從歷徧崖州路
不敢彎弓射鷓鴣

福州雜詩三首

前日題詩自候官
計程今日到雲端
家人定得平安字

最念癡兒不解看

海隅霜熟螭房肥獅子橋東望翠微
安得建陽一斗酒少隨甘旨到柴扉

虎豹幾曾驚石鼓魚龍獨解隱金沙
遮藏翠荔餘千剎掩映朱霞倚萬家

至海口

曾隨仙仗集靈臺流落于今豈不材
但比麻姑休狡獪兩行持節過蓬萊

上元日

蓬萊宮闕峙青天後內看燈記往年誰念東籬山下路
再逢春月向人圓

二月二十四日自瓊州出白沙驛阻風二日不
得渡海是日有幕客送寒衣却出賦詩

盲風怪雨一時晴又阻扁舟兩日程天意似將畱客住
明朝浮海看清明

鬱林次韻寄懷王天輔知事

乍喜連山瘴霧收，黛眉更自鎖鄉愁。
自從行李違滄海，九日初逢第二州。

齋居即事用敖徵君韻二首

故人不見意何如，流水孤邨處士廬。
猶記去年霜橘熟，分甘曾得寄來書。

桑溪竹圃路團團，門巷都非少日看。
送客掉船頻借問，向來江面是闌干。

趙僉憲舊居

閑門付與東風掃獨客殘春思遠道日午不見蝴蝶飛
細看兒童弄芳草

春日次韻友生絕句二首

馬頰河陽近北辰去來猶爾恨通津陌頭總是春風樹
自笑楊花只戀人

旅食京華日欲晡家園迢遞隔天隅妻孥預識羈懷苦
解事新來一字無

西軒即事

行厨晚食坐蕭條
欲買銀魚待早潮
鼓絕山城門未掩
夢和疎雨度西橋

春日西郊

東風千里福州城
綠水青山老送迎
惟有垂楊偏待客
數株殘雨帶流鶯


聞角

西風嫋嫋拂弓旌
千里來看曉角聲
縱復淒涼歸未忍
炎州此外更無城



元詩選初集卷二十九

謹案第二十三頁後八行烏蘇舊作烏撒今改



總校官候補中書臣吳紹潔

校對官編修臣馬啟泰

謄錄監生臣姜也魯

欽定四庫全書薈要

集部

元詩選初集卷三十

詳校官候選知縣臣吳甸華



欽定四庫全書薈要卷二萬三百九十

集部


元詩選初集卷三十

長洲

顧嗣立

編

揭傒斯秋宜集

 傒斯字曼碩龍興富川人幼貧讀書刻苦大德間
稍出游湘漢湖南帥趙淇素號知人謂之曰君他

日翰苑名流也程鉅夫盧摯先後為憲長亦皆器
重之鉅夫因妻以從妹焉延祐初薦授翰林國史
院編修官遷應奉翰林文字前後三入翰林天歷

初開奎章閣首擢授經郎與修經世大典累進翰林侍講學士同知經筵事至正初詔修宋遼金三史與為總裁官卒年七十一追封豫章郡公謚曰文安曼碩初入史館平章李文忠公孟讀其所撰功臣傳歎曰是方可名史筆若他人直謄吏牘耳既復受知於王樞密約趙承旨孟頫元學士明善東南文望如四明袁桷巴西鄧文原蜀郡虞集有盛名公卿間曼碩與清江范梈浦城楊載繼至翰

墨往復更相酬唱曼碩在諸賢中敘事嚴整語簡
而當一時朝廷典冊及元勲茂德當得銘辭者必
以命焉殊方絕域共慕其名得其文者莫不以為
榮善楷法尤工行草詩長於古樂府選體而律詩
長句偉然有唐人風所著曰秋宜集虞學士評其
詩謂如三日新婦又謂如美女簪花殆即史所稱
清婉麗密者歟

臨川女

我本朱氏女住在臨川城家世事趙氏業惟食農耕五
歲父乃死天復令我盲莫知朝與昏所依母與兄母兄
日困窮何以資我身一朝聞密言與盲出東門阿母送
我出阿兄抱我行不見所向途但聞風雨聲行行五里
餘忽有呼兄名兄乃棄我走客前撫我言我與趙世親
復與汝居鄰聞汝卽赴死扶服到河濱我身盡沾濡不
復知我身汝但與我歸養汝不記年泠泠遵旋路咽咽
還入城城中盡驚問戚促不能言望門喚易衣恐我身

致患再呼我母來汝勿憂飢寒汝但與盲居保汝母女
全我母為之泣我鄰為之歎喜我生來歸疑我能再明
況得與母居不異吾父存我今已十三溫飽兩無營我
母幸康強不知兄何行我母本慈愛我兄亦艱勤所驅
病與貧遂使移中情當日不知死今日豈料生我死何
足憾我生何足榮所恨天地生不如主翁仁誰能為此
德婁公名起莘

此詩用韻多誤以其
事有闕勸戒存之

夏五月武昌舟中觸目

兩髯背立鳴雙櫓短蓑開合滄江雨青山如龍入雲去
白髮何人竝沙語船頭放歌船尾和篷上雨鳴篷下坐
推篷不省是何鄉但見雙雙白鷗過

正月十二日尋盧學士船至漢口畱詩為別

晴江澹微瀾曳雲在曾巘參差連舫出散漫羣鷗遠始
知遵漢廣遙睇高旆卷懷賢每忘賤臨流亦忘蹇蒼茫
景將入窈眇春猶淺新知遽相違餘悰何由展

黃尊師高軒觀鵞因畱宿

開軒南嶽下世事未曾聞
落葉常疑雨方池半是雲
偶尋騎鶴侶來此看鷺羣
一夜潺湲裏秋光得細分

衡山縣曉渡

古縣依江次輕輿落岸隈
鳥衝行客過山向野船開
近嶽皆雲氣中流忽雨來
何時還到此明月照浴洄

題王山仲所藏瀟湘八景圖卷走筆作

錄四

朝送山僧去莫喚山僧歸
相喚復相送山露溼人衣
煙寺晚鐘

顥氣自澄穆碧波還蕩漾應有凌風人吹笛君山上
洞庭秋月

天寒關塞遠水落洲渚闊已逐夕陽低還向黃蘆沒
平沙落鴈

孤舟三日住不見有人家昏昏竹籬處却恐是梅花
江天莫雪

以事暫如武昌發臨川

江轉欲無路山迴忽似圍客程秋共遠物色晚多疑稍

稍沙鷗集怱怱野樹稀武昌今夜夢定有故人知

女兒浦歌二首

女兒浦前湖水流
女兒浦前過湖舟
湖中日日多風浪
湖邊人人還白頭

大孤山前女兒灣
大孤山下浪如山
山前日日風和雨

山下舟船自往還

鐵崖竹枝詞序曰揭曼碩文章居虞
之次如歐之有蘇曾云其竹枝詞為

女兒浦歌其風
調不在虞下也

送黃五舅得武陵校官還辰州寓居省侍

寧上山頭種禾黍莫向他鄉作羈旅山田得雨尚有年
他鄉顛顚何人憐一身千里家何在全家更在沅湘外
獨樹雞鳴楓葉飛荒邨鴈沒蘆花碎親在窮邊望子還
子在長途衣復單居無寸田出無僕明年作音佐官當食
祿

貧交行

驅車涉廣川揚帆陟崇丘結交四海內中道多愆尤朔
風厲苦節獨鶴橫九州朝拂三島樹夕過五城樓兩翅

偶寒影曠然何所求登高臨大江日莫萬里流時哉疏
鑿人八年忘外畱出必益稷俱歸與夔龍儔進退兩不
疑功成垂千秋萬事日相敎恩情若雲浮吾心苟不渝
反覆安足仇自非天地外何能獨忘憂

別武昌

欲歸常恨遲將行反愁遽殘年念骨肉久客多親故佇
立望江波江波正東注

南康夜泊聞廬阜鐘聲

廬山三百寺何處扣曾雲宿鳥月中起歸人湖上聞入
空應更迴近瀑正難分遙想諸僧定香爐上夕熏

春日雜言二首

冪歷揚柳枝蒙茸春草齊天天誰家婦采采臨路歧零
露沾其裳蛛絲卷其衣樹高身苦弱蠶飢行復遲辛苦
事姑嫜宿昔減容輝見者皆歎息此心知獨誰良人日
莫至醉問爾何為

五歲能讀書十歲能賦詩十五事遠遊三十無所為既

乖俯仰責復為鄰里欺生計日已疎世態多瑕疵煌煌
金張門徒隸皆光輝日晏賓客集軒車如風馳一笑擲
千金片言委黃泥齊生獨抱瑟來往何逶迤

夢武昌

黃鶴樓前鸚鵡洲夢中渾似昔時遊蒼山斜入三湘路
落日平鋪七澤流鼓角沈雄遙動地帆檣高下亂維舟
故人雖在多分散獨向南池看白鷗

遊麻姑山五首

并序

湖北憲使程公閒居盱上二年矣五月二十日詔
拜翰林學士又十日公與使者及諸客同遊麻姑
山輒以覽歷所止賦詩五首

雲關

君子荷初服恩至若無榮
穠穠芳雨散悠悠蒼山行危
關擁霧黑飛桁緣雲青苔
鮮滑如積杉松窅冥冥時
逢負苓翁忽聞流水聲舉
足向益高矯然欲遐征徒
隸各忘倦矧彼高人情

飛練亭

神工擲天紳挂之兩崖間萬古輪不盡誰能測其端勢
割山石愁氣挾草木寒安得天風吹繫彼日月還麻姑
綠雲髮黝黝長不殘

湧雪亭

泉源出地底仰向雲中行擘崖瀉千丈亂石皆騰擲風
霆日夜急雨雪虛空明不有神物扶茲山應久傾噴薄
側飛鳥砵訇愁百靈仙家信為好喧聒何由平

三峽橋

兩山東飛橋下塹不測淵誰開萬尋鐵逗此無窮泉淙淙輒空曲洶洶投奔川陽光下照之忽作龍騰天常恐桑田變中有瞿塘船

麻姑壇

嵯峨仙都觀遙望丹霞天後有千歲松前有百頃田風日夏颿沓煙雲晝蔥芊羣彥一時集安知非列仙持觴起相醕罷琴抗高言天道信悠邈人情何拘攣靈君不

可致落景詎少延
仰雖慚冥冥俯實憂
元元主人顧坐客
此中可忘年

病夜

素壁淡窗獨客身
挑枝薑肱只為鄰
極慚供給煩賢友
尚恐傳聞及老親
蜚響戒寒相應起
燭花連夜為誰新
多情造物真豪縱
盡力相驅病與貧

寄題馮掾東皋園亭

時雨散繁綠
緒風滿平原
興言慕君子
退食在丘園
出

應當世務入詠幽人言池流澹無聲畦蔬蔚蔥芊高林
麗陽景羣山若浮煙好鳥應候鳴新音和且閒時與文
士俱消搖農圃春理達自知簡情忘可避喧庶云保貞
和歲莫委周旋

宿梁安峽夢故室有感時還盱江

梁安峽裏杜鵑啼絕壁蒼蒼北斗低雲氣倒連山影合
石稜斜鬪浪聲齊南風盡日迎歸客落月空江夢故妻
一室十人分數郡百年幾處候晨雞

山莊晚立有懷舍姪沆督獲臨川

藪藪黃桑葉蒼蒼白竹峰居人爭野碓歸客背邨鐘路
暗緣溪涇山寒著霧濃阿咸收稻未辛苦闕相從

雨述三篇

江南臘月天未雪居者單衣行苦熱連山郡邑瘴盡行
豈獨嶺南與閩越逋民穰穰度閩山十人不見一人還
明知地惡去未已可憐生死相追攀

近聞閩中瘴大作不間邨原與城郭全家十口一朝空

忍飢種稻無人獲共言海上列城好地冷風清若蓬島
不見前年東海頭一夜潮來迹如掃

冬來一晴四十日三日南風當有雪不知閩嶺今何如
念我故人書斷絕劔南判官心所親甌寧大夫政有神
腐儒多事浪憂喜安得貽書兩故人

春莫閒居寄城西程漢翁十五韻

迢迢層城阿我我鳳皇山下有隱淪士能為淮漢言兩
日一寓音五日一承顏每談經濟事恆及離亂間言辭

多忼懣文字少凋殘不歎東逝川但憶南山田寧與無
心遊不受衆目憐褰衣必峻嶠散步亦名園舒卷信在
襟蕭寂固所安經春僂疾痂撫時增懦孱羣書亂藥裏
高卧掩荆關蹇余屬久要朝詣常莫還醜劣媿高情焉
知君所觀日出衆鳥語蒼岑滿樓端申章寫溪誼譎薄
何由宣

長風沙夜泊

長風沙風沙不斷行人嗟行人嗟奈君何南風正高北

風起大船初灣小船喜移船更近大船頭不獨風沙夜
可憂但祝行人好心事長江何處是安流茅屋參差數
株桺時平尚置官軍守青裙老嫗詫鮮魚白髮殘兵賣
私酒魚賤可買酒可沽他人心事知如何

何郎失鏡詞

團團如月不曾虧家人親置枕中時朝朝將正頭上噴
時時攜鑷鬢邊絲古文宛轉何人造失來始覺今難討
街頭不直半緡錢古銅終較今銅好向人不敢再三尋

客裏空疑同舍心，萬里相隨一朝別。
夜夜還瞻天上月，曉出順承門有懷太虛。

步出城南門，悵望江南路。前日風雪中，故人從此去。

京城閒居雜言四首

朝從獵城南，莫從獵城北。白馬喻飛翰，輕裘如膏澤。
塵起知獸駭，風高驗鳥疾。隻箭落雙鷺，千金出俄刻。
歸來拜恩寵，樂飲過一石。僮奴增意氣，賓客改顏色。
常恐文法士，輕薄多瑕擿。高門臨廣衢，秋風上荊棘。

朔土高且厚民生勁而彊榆柳雖弱質生植益繁昌桃李大於拳棗栗充饌糧誰謂苦寒地百物莫得傷青青雲夢竹宿昔傲雪霜移植於此庭不如芥與楊竹性豈有改繇來非本鄉

眇眇寒門士客遊燕薊城上無公卿故下無舊友朋裘褐不自蔽藿食空營營四顧裁沴餘但聞號哭聲日負道德懿敢懷軒冕榮節食慎所欲聊以厚我生

高步覽九州誰獨無與親同室不相喻矧彼途路人誘

詎更驅迫巧詐日眩真共美為善樂莫知與善鄰未足
保厥躬已謂貽子孫一言易為義一恩易為仁世無魯
東叟何以慰心神

泊安慶時再北遊

夜泊淮西郡寒生客子衣酒家臨岸閑野燒映江飛雲
盡月初出潮平風漸微前年城下路此際正南歸

漁父

夫前撒網如車輪婦後搖櫓青衣裙全家託命煙波裏

扁舟為屋鷗為鄰生男已解安貧賤生女已得供炊爨
天生網罟作田園不教衣食看人面男大還娶戲家女
女大還作戲家婦朝朝骨肉在眼前年年生計大江邊
更願官中減征賦有錢沽酒供醉眠雖無餘羨無不足
何用世上千鍾祿

高郵城

高郵城城何長城上種麥城下種桑昔日鐵不如今為
耕種場但願千萬年盡四海外為封疆桑陰陰麥茫茫

終古不用城與隍

濟州初度

辭家計日逢初度
遲日暄風在帝京
曉起慈親望天北
行人初泊濟州城

楊柳青謠

楊柳青青河水黃
河流兩岸葦籬長
河東女嫁河西郎
河西燒燭河東光
日日相迎葦檐下
朝朝相送葦籬傍
河邊病叟長回首
送兒北去還南走
昨日臨清賣葦回

今日販魚桃花口連年水旱更無蠶丁力夫徭百不堪
惟有河邊守墳墓數株高樹曉相參

雜詩二首寄彭通復

區區九州內橫縱數千里誰設山與河愚者分表裏京
師天下本萬國赴如水珠犀從南來狗馬繇西止浩浩
荆吳船日夜行不已生材無定所一物孰非已皇天仁
且廣君道亦如此我思古唐虞當日誰共理

脉脉我所思彭氏躡遐蹤婉婉若處子未曾出房櫳相

望四千里踰年闕相從五月君寄書九月達京中我書
欲報君書到歲已窮豈不懷繾綣無由覲君容參差天
際雲縹緲乘朔風羽翼不吾施翩彼南飛鴻君有高世
行我無適時功天命人得違出處諒非同

史館獨坐

地夏天逾近風高午尚寒虛庭松子落欹檻菊花乾撫
卷俱千古憂時有萬端寂寥麟父筆才薄欲辭官

山水圖

幽人無世事高卧謝浮名
山掩晴時出溪流盡處行還
聞有漁釣相問扣柴荆不
歸門前路莓苔滿地生

送道士薛玄卿歸江東

知君此去漸難招只在人間已
廓寥市上有時逢賣藥
山頭何處覓吹簫仙巖花落
溪流滿鬼谷雲開對影遙
未必故山安隱逸海天涼
月夜蕭蕭

祖生詩

浦城孝子身姓祖自憐性命如
糞土生纔五歲遭亂離

有母更被官軍虜零丁二十八春秋母縱得生何處求
天地茫茫明月恨江山漠漠白雲愁忽得母書驚母在
看書未盡淚先流書云流落河南縣河南蹋遍無由見
唐州境上忽相逢白髮蕭蕭霜滿面誰知喜極情轉悲
傍人更問初別時千生萬死到今日始為母子東南歸
東南迢迢閩山路入門猶記階前樹居人傳說盡相看
雞黍提攜竟朝莫祖生母子真可憐少壯離別老大還
同時鄉井被兵者幾人骨肉能生全願生母子長壽考

四海昇平永相保

燕氏救兄詩

千金之子不死市楚人竟殺陶朱子生者可殺死可生
千金為重骨肉輕誰謂平陽有燕氏傾家乃出而兄死
弟再有兄兄見弟里閭驚嗟官吏喜嗚呼安得天下之
吏廉且循庶政如水無冤民

送華尊師以天壽節奉詔祀武當

靈時嚴漢祠神峰標楚甸羽人丹丘伯承詔馳嘉薦華

渚曜玉虹條風舞元燕長淮雨中瀉喬嶽雲間獻涉旬
歷峻趾梯空峇弘願授簡香始升揭虔帝如眷天清翼
軫動地肅玄武見飛響迴更聞奇祥靜逾緬是中有真
侶謂張真人
有進行蚤接諸方援肝胝負畚鍤鑿翠蓄雷電金
芝產齋房喬雲冠巖殿祈禱無歲年會節方紛衍既協
時君降又樂明祀徧聖歷齊堪輿豐澤周寓縣還歸報
天子獨往奚所羨

送馬雍古御史撫喻河西

我皇屬憂顧君子得安居孟春風且寒遺子以脩途四
牡何翩翩迴首睇神都我懷正紆鬱歿忽已踰積雪
被長鬘姜者何時蘇歸彼蓮花峰上出浮雲嚮白日皦
以縣下視若玄墟煙塵起西北原野無定株行者中顧
懷居者念其廬黃河洶東流乃自崑崙渠四海豈不曠
切若肌與膚親賢遠讒人古以致康娛君子誠多才乃
用在馳驅秦隴阻關塞歲月浩已徂鞠躬盡明義足為
世所模

送周山人之遼東

物變風已暄庭虛雪猶在每與君子違偏驚歲年改名
山先夢到靈藥隨方采明日望行人雲槎隔遼海

李宮人琵琶引

并序

鄆縣亢主簿言有李宮人者善琵琶至元十九年
以良家子入宮得幸上比之昭君至大中入事興
聖宮比以足疾乃得賜歸侍母給內俸如故因亢
且乞詩於余遂作李宮人琵琶引其辭曰

茫茫青塚春風裏歲歲春風吹不起傳得琵琶馬上聲
古今只有王與李李氏昔在至元中少小辭家來入宮
一見世皇稱藝絕珠歌翠舞忽如空君王豈為紅顏惜
自是衆人彈不得玉觴為舉樂乍停一曲便覺千金直
廣寒殿裏月流輝太液池頭花發時舊曲半存猶解譜
新聲萬變總相宜三十六年如一日長得君王賜顏色
形容漸改病相尋獨抱琵琶空歎息興聖宮中愛更深
承恩始得遂歸心時時尚被宮中召強理琵琶絃上音

琵琶轉調聲轉

一作逾

澀堂上慈親還佇立回看舊賜滿

牀頭落花飛絮春風急

集賢大學士趙國公王開府慶八十應制

昭代雍熙日詞林賦頌時
紫宸丹詔出甲第五雲垂
廟青宮裏王公玉樹枝
朝趨陪綺角夕侍接龍
夔際會真難及飛騰已在茲
暴公初繡斧方叔更藩維
霜簡驚風采天官肅羽儀
還迎代邸入竟被漢文知
位望躋三少權衡俯百司
每蒙天黼黻直許國著龜
鳳吹廣寒殿

龍舟太液池羽觴春侍宴玉座夜觀碁德業前賢繼辭
華後進推高情希廣受餘事擬徵珪全趙山河富瀛洲
日月遲九卿看綵服八表表龐眉皇覽逢初度殊恩介
壽祺黃封中使出玉食尚饗移國老陳嘉慶李韓公序羣
工播盛辭禮非前代有施及老臣宜福祿何人竝忠貞
百歲期聖心誠念舊政用作臣規

結羊腸詞

正月十六好風光京師女兒結羊腸焚香再拜禮神畢

翦紙九道尺許長撚成對綰雙雙結心有所祈口難說
為輪為鐙恒苦多忽作羊腸心自別鄰家女兒聞總至
未辨吉凶憂且畏須臾結罷起送神滿座歡欣雜顚顚
但願年年逢此日兒結羊腸神降吉

小孤山次韻

小孤山前一迴盼蒼然始識孤山面隔江疊嶂開翠屏
絕壁浮雲飄素練憶昔初蒙翰林聘艤棹揆奇不知倦
捫蘿陟級至絕頂目極神開氣為變大江東匯彭蠡來

晝夜崩騰奔海甸，笳鼓遙聞日月動。
帆檣忽度乾坤轉，舟人不識造物奇。
但趣急趁南風便，蚤悟微官七載縛。
底用區區厭貧賤，淡窗冷壁守編摩。
何異揚雄困雕篆，重來勝地歲云莫。
短景催人疾於箭，天昏一火明山半。
石底猶疑有雷電，彭郎磯下寒浪湧。
坐客正說龍君傳，人生可喜還可憐。
世事堪違不堪戀，明朝匡廬復入眼。
雖有此境何由羨，武城先生獨好事。
名山每恨遊難徧，豐城客子無一錢。
但當作詩乞如願。

贈別曾編修歸廬陵葬學士兄

孟冬涼風厲，謁告歸廬陵。阿兄在九原，歲莫豈遑寧。兄
昔事武皇，海內希英聲。意氣動人主，文采何縱橫。時事
一朝異，長揖去躬耕。令弟紹芳猷，策足在承明。如何奄
忽間，南北隔死生。方舟發京國，日落煙霧青。萬感緣中
來，惕焉如有懲。羈臣戀魏闕，一夕魂九升。君子恩義重，
況此骨肉情。情淡不可忘，悠悠道路長。山川日夕改，我
行殊未央。稍出燕冀都，已涉齊魯疆。高天圍四野，悵望

但茫茫道傍多古墳瑩域遞相當荒草吹北風日夕下

牛羊不知何代人於此閱興亡自古既有死誰獨免摧
傷死者雖所同私懷詎能已途路猶感傷况吾兄與弟

世俗日衰謝常懼莫能起生者忽若遺誰復哀其死念

昔賢哲人一一去為鬼詩書捐篋笥采采當路子挾藻

厠明庭幸與君子同矧在弱冠年已獲承其風家本聖

門後孝友世所隆何意手足親一別曠音容及我南歸

日舟楫復相從皛皛寒日高冥冥厲征鴻落帆滄江際

渺然忽西東努力慎所託無為謾勞躬

贈王郎

王郎楚狂士意氣飛秋霜讀書一萬卷下筆數千行富
貴視浮雲况肯矜文章十五恥閭里掉臂辭故鄉夜宿
東海月朝買西州航瞋目王公前結客少年場一飲或
一石一醉或一觴寧揖屠狗人不與俗士當千金不易
笑歲暮單衣裳阮籍在窮途英聲連四方鸞鵠有時鍛
反媿燕雀翔世無劇孟交不及青樓倡燕趙如花人翠

袂黃金璫不識豪俊士空媚癡與狂王郎遠過我坐我
枯藜牀終夕無酒飲撫髀歌慨慷平明別我去極目空
茫茫

畫鴨

春草細還生春雛養漸成茸茸毛色起應解自呼名
送涂雲章訪舊武昌却入京師

垂雲厲驚風萬里摩高圓蟠泥鼓巨浪豈顧九重淵毛
生入楚庭穎脫俄頃間粲粲一作涂公子長嘯起丘樊朝

辭豫章臺莫過匡廬山大帆割鸚鵡極目空波瀾黃鵠
錦袍仙吹笙紫霞端相顧一笑粲青春滿南天黃金築
高臺更覺郭槐賢聯翩樂劇輩相逐入幽燕平明九門
開劒珮踰五千豈無一字薦傾倒平生言東風杏花開
待我薊門前

歸舟

汀洲春草徧風雨獨歸時大舸中流下青山兩岸移鵝
啼木郎廟人祭水神祠波浪爭掀舞艱難久自知

小孤山曉發和蔡思敬韻

日落霞明錦浪翻
厓傾石峭白雲閒
乾坤上下雄孤柱
巴蜀東南壯此關
神物夜移風動地
仙舟曉渡月漫山
回瞻絕頂登臨處
空翠溟濛杳靄間

白楊河看月

白楊河上看明月
昔人曾見今人別
茅屋數家河上邨
化作三山白銀闕
波平風靜棹歌來
萬頃冲融鏡面開
今夜江南憶遊子
空瞻雲漢上昭回
茫茫萬里燕齊路

北斗縱橫泰階曙
黃河東逝月西流
明日南風過洪去
歌風臺和李提舉韻

萬乘東歸火德開
漢皇曾此宴高臺
沛中父老謳歌入
海內英雄倒載回
湯沐空餘清泗在
風雲猶似翠華來
穹碑立斷蒼煙上
靜閱人間幾劫灰

題嚴陵獨釣圖

何事玄纁入里閭
羊裘暫脫就安車
空令太史驚同寢
猶把狂奴視報書
一出聊為天子重
諸公莫道故人疎

朝廷自足中興士且放桐江著老斲

題鼯鼠食瓜圖

種瓜中園予亦勤止瓜長而實汝則殘止雖則殘止予
敢汝仇天實汝生予將何仇汝食之甘既肆既閑實之
食矣無傷予根根存而微惟予之窮根盛而實惟乃之
功

送蔡思敬還豫章有懷遼陽李提舉

來日能同去不同獨攜別恨向秋風眼看亂葉渾無定

心與浮雲并一空黃獨山中歸自斲玉梅溪上夢先通
莫嗤畱滯京華者更有遼陽送斷鴻

孔林圖詩

并序

集賢待制周侯能修禮於孔林侍讀學士商公圖
之史官揭傒斯詩之

峩峩尼山蔽于魯邦篤生聖人維民之綱尼山之下有
洙有泗有蔚孔林在泗之涘維彼聖人誘之教之凡厥
有民則而倣之維彼聖人覆之載之凡厥有民敬而愛

之既誦其言亦被其服孰秣其馬于林之側既誦其言
亦履其武孰秣其馬于林之下六轡既同周侯之東薦
之侑之聖人之宮其音洋洋其趨踰踰其臨皇皇聖人
元臧商氏圖之式昭其敬載瞻載思罔不由聖

李將軍歌一首送李天民赴邵武軍口巡檢

李將軍材且武儒冠換得兜鍪去身疑南極老人星氣
食陰山雪毛虎雕弧白馬金僕姑天地昂昂此丈夫五
十方為求盜使人生何用苦詩書寄言邵武諸官長不

是尋常一腐儒

時中書以吏部儒選員多有十年不得調者奏以為閩廣諸道巡檢然多非其

人而天民式稱是選
老人星其常自喻

題桃源圖并序

江右龍虎山南十里有桃源者劉王二尊師所辟也臨江范亨父為之記余為賦五言詩十七韻

桃源非一處龍虎畫難同內外關踰鐵高低石作叢黃

旂青劒北紫蓋白雲東蟾影當宵迴蛾眉抱月弓

六峰名

千重藏曲折四面削虛空地戶吟風黑天池浴日紅雪

霜翻濺瀑雷雨瀉崩洪暗識援啼遠晴聞鳥語工危龕
三井秘絕澗九橋通江合仙巖怒山連鬼谷雄劉王開
闢後秦晉有無中時見看桃侶頻逢採藥翁丹臺寒漠
漠琳宇氣熊熊濟勝非無具緣源恐莫窮煙霞俄變滅
草樹杳龍蔥四序何勞誌羣愚儻擊蒙誰言武陵近十
里上清宮

送王畱守宣慰荊湖

舟楫連檣出薊丘弓刀千騎入荊州歌翻郢雪寒暄變

恩逐岷波日夜流
雲雨暝連神女宅
山川晴繞仲宣樓
豈無賢士堪招隱
應向鹿門溪處求

寒夜作

疎星凍霜空流月
涇林薄虛館人不眠
時聞一葉落

送詹尊師歸廬山

香鑪峰色紫生煙
一入京華路杳然
雲碓秋閒春藥水
雨犁春卧種芝田
書憑海鶴來時寄
劒自潭蛟去後懸
忽報歸期驚倦客
獨淹微祿負中年

過何得之先生故居三首

可憐古井門外依舊鐘樓屋西何處高吟痛飲黃華翠

竹都迷

先生有詩云一井當門凍寒光照四鄰又我住東街北鐘樓在屋西

軋軋機聲日莫依依揚柳春柔鄰下中郎小女曾聽唱

我高郵

先生常喜余高郵城詩相見即呼高郵城來每相對酒酣則朗誦數過

頭上烏紗分贈篋中縞楮相酬不道別時長別誰知愁

是真愁

延祐五年冬十月余南歸以巾材一段見贈予以白楮被報之別時殊黯然也且手書其三代

名字授子若有所屬然也

送譚仲章歸長沙

君家雲陽下忽向雲陽歸行路有南北看山無是非三
湘迴鴈盡孤劒白虹飛亦欲投簪去從君采薜薇

我我亭詩并序

殷仲堪答桓溫曰我與我周旋久寧作我宜春黃
元瑜取以名其亭曰我我為賦詩一首

我游于袁于龍之于有闢閑閑有環言言有構桓桓維
集之安我居我處我笑我語有翼其所而敢予侮我植

孔嘉我構孔華曾莫之迎而莫我多彼馳者子亦孔勞
矣既我覲矣亦莫我逮矣嗟殷氏之老猶弗桓是友我
不我友將誰歸咎溫溫其穌瀏瀏其清藹藹其芳煥煥
其明嗟維古之人尚或予聽

題臨江同知問流民事蹟

江北流民七十口三十餘年在江表朋凶結惡四百餘
白刃差差歷邨保崩騰所向如投空白晝搜金都市中
頃由南昌入豐邑反賂守者為先容長官坐堂冠入室

妻子莫逃况金帛豈無鄉民敢相敵長官一揮翻辟易
臨江貳守廉且武手縛其渠散其伍豈惟鄉民得按堵
鄰境聞之皆鼓舞其渠在獄伍四歸天府上功民俗熙
乃知一念敬厥職萬事至難皆可為人民社稷我所有
安得坐視如雞狗人在雞狗猶愛之民社豈在雞狗後
請君看取臨江守

送李都事赴湖廣省幕

堂堂李通甫起家掌邦憲直氣橫九秋神明激雷電再

登蘭臺上愛國心靡轉時當至治末有位日兢戰崩騰

五華山鑿翠起臺殿執筆佐御史力諫明且辨斧蹟已

在前獨立目不眴駸尋國多故灾異周八埏君復贊宣

政赤手握銓選守法踰天官反得官長怨我皇奮江漢

撥亂啓天眷乾坤再開闢日月重昭絢磊落收羣材疎

戚共登薦君名一朝起亦作丞相掾丹心益傾竭婉畫

勤替獻好惡古難同禍福巧相禪天子憂南紀藩宣必

時彥下逮曹屬微簡選亦精練君得南省佐聞者盡驚

羨偃僂辭闕庭飄搖出畿甸餞送盈路衢懇款陳志願
去年天下旱窮蹙無貴賤賑卹當及時本末須並見方
春農事興不廢乃為善又聞南中賊憑陵及州縣黎獠
本吾民撫綏在方面恩信足以懷逼迫使生變況我聖
天子轍迹昔所徧勗哉籌策良無使空蹂踐京城雨初
過草樹鬱蔥舊喬木多蚤鴛高堂有新燕煩辭君勿誚
君歌我其抃

畫鷹

文梁五色條秋高意氣豪怒張兩目直霄漢豈與短翮
翔蓬蒿妖狐畫作猛虎嗥騶虞并與神麟逃嗟爾飽食
心空勞

吳子高悼亡歸岳陽

都門落葉滿遊子去京畿忍聽離鸞操遙逐秋鴻飛愁
霜曉入鏡淚雨夕沾衣煙樹黃河岸風帆采石磯平沙
迴渺漫寒雨暖熹微客心閒轉切鄉書近却稀夢聞兒
女泣行將僮僕依竊慕漆園放誰云潘岳非乘濤慣不

險迴江望若圍武昌未易到更向岳陽歸

進士張于高得邛州判官歸成都

邛竹山前負勢迎去年曾是一書生天寒劒閣猶車馬
雪滿繩橋正甲兵即恐徵求民力竭莫將憂患客心并
六千餘里關河路不盡溪期遠別情

寄題傳尊師兄弟所作寧壽道院

鍾榮之山千萬峰琵琶塵湖相疊重兩翁入谷起臺殿
半夜空山聞鼓鐘猛虎如逢澗邊石飛龍却是雲間松

黃庭書罷人難見
鴻寶披殘手自封
度壑采芝隨鹿迹
登厓望日躡雲蹤
已知塵世惟堪笑
不是神人定少逢
辟穀有方挑更美
園基無地橘相容
但餘一念封人祝
未與人間萬事慵

雲錦溪棹歌五首

雲錦溪中雲錦鮮
好在高秋八月天
西蜀錦江那得似
西湖綠水更須憐

纔過浮石是藍溪
溪上青山高復低
山中泉是溪中水

尋源直到華山西

藍溪南去到藍洲水底蘄蘄石不流迴望朱宮雲霧裏
白雲深處更高樓

挹仙亭下薛公橋紛紛抵莫更連朝唯有橋西楊與柳
無情長繫木蘭橈

溪上層層雲錦山垂楊盡處是龍灘不是孤舟來逆上
何人知道世途難

題胡虔汲水蕃部圖應制

沙磧茫茫塞草平沙泉下馬滿囊盛曾於王會圖中見
真向天山雪外行聖德只今包宇宙邊庭隨處樂農耕
生綃半幅唐人筆畱與君王駐遠情

題內府畫應制

曹將軍下槽馬圖

曹霸畫馬真是馬宛頸相摩槽枥下卓犖權奇果如此
豈有世上無知者朱絲不是凡馬韁天閑十二皆龍驤
曾從天子平四方畫圖彷彿餘驪黃華山之陽春草長

韓幹馬

韓幹畫出曹將軍幹惟畫肉猶逼真昂藏四顧欲飛去
老奚安知馬有神想當此馬未畫時朝刷吳越莫燕秦
頓轡長鳴風動地不數驊騮與騏驎當時用舍那知許
粉墨蕭條尚雄武千金駿骨何足論萬世長留羣玉府
奉送全平章赴江西

聖主思南土明公起集賢直期凋瘵後共致太平年金
虎分符重文龍賜服鮮權綱兼將相標格近神仙天地

三江外星辰北極邊丹心齊出處素志在陶甄請述江
南事都非大德前但微扶弱美竟坐抑強偏無復同憂
樂徒令舞智權平時吹渤澥暗室伏戈鋌貪競明相訓
忠良默自憐民心隨日壞世態與時遷况復兵饑接仍
聞病癘纏誅求殊未已蝨賊轉相挺若擬寬憂顧先須
解倒懸久飢寧擇食多病但求痊一語堪懲勸微機足
轉旋已知平似水更道直於弦遙想聞公至渾如望歲
然九重天上別百丈霧中牽日月明金節山河入畫船

四方初息馬五月正鳴蟬豐樂田多黍生香澤有蓮
宗標魯地廬嶽壓湖天水怪收崩浪山靈掃瘴煙歡呼
麟鳳出踴躍吏民先笳鼓趨雄鎮旌旗覆廣川下車和
氣應袖手頌聲延膏雨侵淮甸仁風扇海壖忠貞真世
篤調燮有家傳赤子皆同體蒼生且息肩龔黃須警策
方召在蕃宣

桃花鸚鵡

嶺外經年別花前得意飛客來呼每慣主愛食偏肥才

子憐紅鬢佳人學綠衣
狸奴亦可怕莫自戀芳菲

趙孝子

廬陵趙孝子四歲父行賈一去三十年家惟大母母大
母已云沒而父行不歸兒長亦有婦母子聊相依從父
自北來汝父久已死母子哭相問父死何鄉里聞汝父
死時不知汝父處汝但欲往問京師多舊故再拜別阿
母行行至京師自念不見父兒死無歸時乃有曾長一作
老者往昔與父善言汝父死處濱州利津縣徒跣二千

里簿言至利津朱琪張文輩一一陳所因死以某年月
葬以某木棺姓名某所題近在城南端城南塚纍纍弱
然榛莽中極目千萬塚誰能識其蹤行哭七日餘欲死
不得所生者無由知死者豈能語解髮繫馬鞍負之墳
墳過吾父儻有知髮解鞍自墮俄至一墳前鞍墮髮自
解開墳見前和題字宛猶在既見父姓名痛絕心始安
冎骨陳野祭禽鳥聲為酸鄰老四面來驚歎未曾有相
帥報縣官縣官駭之久即日上大府大府咸異之次第

聞中朝行子正南馳行子行且傷哭踴如初喪路遙山
川阻何時至故鄉故鄉既云至葬祭無違禮母子永不
離萬事若流水聞者盡稱孝見者皆感泣期爾百世昌
望爾百祿集兒今一無願願母長不老歲歲父墳前灑
飯墳上草

題姑蘇陸友仁所藏衛青印

白玉蟠螭小篆文姓名識得衛將軍衛將軍今何在白
草茫茫古時塞將軍功業漢山河江南陸郎古意多

送鄉人祐上人從師歸當陽

學道玉泉寺從師天子都
流年春事半歸路客帆孤
山勢遙連蜀江聲不入吳
故園如可到種芋有遺區

寄題張齊公廟

東安猛將張齊公十八奪父軍
囚中至元召募起亡命
父子南伐收奇功酒酣一躍馬上立
拔劍四顧犇雷風
十年轉戰江漢上萬里直挽安南弓
乾清坤夷四海一
勳在旂常心帝室身封萬戶傳
子孫誓不偷生汙天秩

天下豐盛大德年天子明聖宰相賢小臣劉涇射功利
上疏自薦能開邊鬼方寡婦號八百嫂叔操戈自爭國
劉深一言取大官遠帥官軍陵險阨五溪運糧數萬家
哭聲震動湖南北發徒開道徑折節既勤其民大求索
斗量金珠谷量馬谿壑之欲安可塞此時張公亦在行
捐軀力諫皆莫克折節薄險伏四起劉深夜遁張公死
鳥飛不度山川愁坐看英雄化為鬼乃知自古守邊鄙
大忌邀功貴寧救張公廟食東海頭劉深梟首蠻煙裏

張公世為忠孝門劉深萬年穢青史兩家同死不同心
試與題詩作臣軌

番陽蕭性淵攜其祖將領所愛唐琴號霜鐘者
還自和林求詩六月三日五門宣赦後作

嵩州昔有蕭將軍讀書學劍天下聞南隨龍馬渡江去
尚有孤琴傳子孫孤琴云是唐人斲昔日軍中自行樂
至今猶存殺伐聲一鼓哀風振寥廓將軍之孫才且良
文能作賦武蹶張秦皇城下飲白馬祁連山中射白狼

時平好文不好武抱琴却歎儒衣誤昭王臺上看青春
彭郎磯頭夢歸路日長史館幽且閒正冠拂琴為我彈
京城六月日如火霜鐘半夜鳴空山南風自有虞廷操
可惜同心不同調捐琴決眼望青天今日天門有新詔

送毛真人還龍虎山

手綰銀章主秘祠翩然歸去忽如遺塵湖龍井雲間上
鳳曲鸞歌月下歛香逐蘅薇深更入氣交梨棗靜偏宜
南屏風雨平坡雪爭似山中夢覺時

南屏山在上都南
七十里歲扈從至

上都夏秋居焉平坡在大都西四十里西山之上冬春居焉蓋皆所掌祕祠所在

故中憲大夫嶺北行省左右司郎中蘇公志道

哀詩

蘇公廊廟姿推擇起為吏論議動引經舉措必由義惟時方大旱謂咎在冤滯決獄天乃雨凶年化豐歲流聲滿山西憲府立羅致慷慨平生懷遂佐直指使受命按邊鄙正色行使事邊臣既威服使亦免顛躓六曹收雄材兩府資遠器激昂天下事徃徃見謀議十載拘掾曹

彌年困文字雖云富匠贊豈足盡材藝一命厠省僚句
稽得深弊銓選班爵冗出入錢穀細竝緣出多門穿穴
肆姦利有如水 upstream 驅去還復至因風一披蕩暫得免
蒙翳再命主賊曹持平獨不蔽恆求情中實動究法外
意功罪必誅賞義惡俱惕厲三命參宥密令聞益昭晰
和林跨大漠肇造此根柢東際瀚海頭西控流沙裔北
窮陰山外南倚兩都勢連營列萬里倉庾千萬計鎮以
磐石宗重以分省寄憶昔大德末成廟方厭世桓桓忠

獻王功大更多智武德既踐阼宮闕始清閤越邸矜微
勞寵極心乃異國有社稷臣讒乃惑聰睿遂輟股肱任
往重藩屏繫有威如雷霆有恩若元氣耕鑿比中土什
伍相錯置士忘遠戍苦民見太平治道路無拾遺商旅
畢懷惠忠獻一朝沒武皇亦遐棄駿尋延祐中權相擢
天位磨牙吮人血掉尾恣狂獫狁賊骨肉親迫逐見危
墜天人共震怒降灾及茲地大雪深丈餘人馬相枕斃
重為朝廷憂夙夜靡寧志除吏超五等閭者盡驚避蘇

公拜郎中即日辭九陞厚祿非所榮高爵非所貴彼民
亦天民安得皆坐視兼程到官所發廩急周濟死者何
嗟及存者再生遂閭閻漸蘇息竭力補黥劓飛書九重
天請為兵民備募粟實塞下慎勿憚勞費天子賜問勞
名王致金幣至今賴長策當時已多忌如何方賜環及
國竟長逝都人走相哭行子為歔歔崩騰朔風迅慘淡
浮雲曳蒼松拔其根黃鵠鍛其翅幸哉有令子名已注
簡記千秋常山下豪傑一揮涕

題羅稚川所畫臨川羅益謙溪居圖

迢遰臨川郡，泱泱元獻里。
浮上君子廬，閉戶青林裏。
連山煙景晏，斷岸寒沙靡。
日莫孤舟還，荒邨隔流水。

寄題武寬則湖山堂

祝融九千七百丈，六月飛霜灑洞庭。
攸輿學者武寬則，石鼓齋中窮六經。
氣橫瀟湘波浪白，思入嵩華煙雲青。
四千餘里到京國，倒挿五色鳳凰翎。
河西猛將今太尉，一見握手坐廣庭。
立呼愛子俾受業，豈獨汝學我亦聽。

援肩虎頭日侍側長刀大劒羅青熒動陳忠義破肝膽
衆目睽睽開心局丈夫垂遇豈偶爾縱不我聽我則寧
嗟予官冷材力薄每辱竒俊哀矜孱天晴風靜輒過我
如病得瘥醉得醒不為湖山勞夢寐不為富貴疲心形
始知卓識出天性豈彼狗苟蠅營營方今夔臯滿廊廟
洪恩屢降無濫刑長材用世何不可大夫列卿如拾瑩
君如得位立行志慎勿學我空星星我今老矣何所稱
白雲深谷寒煙汀

夢題墨梅

霜空冥冥江水莫江上梅花千萬樹無端折得一枝歸
一雙蝴蝶相隨飛

寄題信州德元觀何真人林園長春亭

長春亭榭倚雲開百里湖山入座來流水繞階時自照
好花如幄手親栽青雲每指尋真路白髮頻登望母臺
墓在六月神龍起潭井人間幾處待風雷
前山

題信上人春蘭秋蕙二首

溪谷煖雲飛重巖花發時非因采樵者那得外人知
幽叢不盈尺空谷為誰芳一徑寒雲色滿林秋露香

賦得春鴈送張郎中省覲揚州

東風吹歸鴈離離翔天側朝發衡陽浦夕過陰山磧
嘹唳浮雲中萬里才一息眷言思親者相望有南北

送聶太祝赴潮州錄事聶天厯潛邸舊人

三載從容禮樂間糾曹新拜度梅關春風忍過金陵道
夜月重經黃木灣盜賊數州相應起甲兵諸道幾時還

憑君細講安民策莫遣邊防一日閒

題俞氏看雨軒

慘淡來何處崩騰忽滿城遙憐四山黑近灑半江明可
愛花間溼偏宜竹上聲中宵未可住高枕寄餘情

賦得吳歌送人歸吳中

三月酒如澠高堂絲竹停繡筵雙鳳影珠箔亂鶯聲疊
應紅牙拍辭傳金縷名綵雲低不度芳塵暗自驚花發
長洲苑日照闔閭城且奉千金壽寧忘萬里情

飲張氏別墅

以下從各選本錄入

楚國多才俊張家好弟兄出門湖水碧畱客野堂清微
雨鳴疎竹寒煙覆古城園人隔畦語歲莫此中行

不寐呈何太虛

隙月斜依壁窗風細著人飄零知命晚牢落夢家頻斷
鴈何曾定鳴雞不肯晨何郎詩句好萬里獨相親

憶昨四首

天歷年中祕閣開授經新拜育羣材宮門待漏嘗先到

講席收書每後回
召試時蒙天語勞
分題不待侍臣催
滿頭白雪丹心在
太液池邊只獨來

宮草蔥茸禁樹齊
日趨延顙對凝暉
朝迎步輦花間立
莫送回鑾柳下歸
碧殿東浮蒼嶽合
金河北引玉泉肥
幾回弘慶門前路
春氣濛濛欲溼衣

已已羣儒映壁奎
端陽侍燕寶慈西
線分學士親臣送
詩賜皇姑御手題
注酒含春瑤露重
承塵轉午錦雲低
日斜共出西門道
既醉猶能散馬蹄

奎章分署隔窗紗不斷香風別殿花
畱守日頒中賜果
宣徽月送上供茶諸生講罷仍番直學士吟成每自誇
五載光陰如過客九疑無處望重華

趙道士山水圖

悄愴寒山曉淒迷野水昏長橋通古寺小艇背衡門路
盡雙松上雲生亂石根如行南嶽莫遙見祝融尊

送人之淮東

扁舟何處客此地飽經過彭蠡江聲合揚州月色多天

低知近海地闊欲橫河自是吾生拙如君定若何

送林彥廣南鎮行香

昔年同事文皇帝出入千門萬戶中漢閣圖書觀每徧
周家祀典學皆通鼎湖忽送飛龍去石鼓空歌我馬同
今日留香南鎮去還尋禹穴酹西風

贈吳主一并序

曹南吳主一妙年力學能文章尤工隸書近自豫
章以職事至京師過予劇談竟日忘去忽以別告

令人惘然詩以奉送

國朝分隸誰最長趙虞姚蕭范與楊趙公溫溫蔡中郎
虞公格格由鍾梁姚蕭二公撼中邦豈以筆法窺漢唐
蕭守高尚姚文章范公清適不敢當縱橫石經兀老蒼
揚侯起家自洛陽華山之碑早擅場旁出捷入無畱藏
曹南吳氏俊且良古意颺颺浮匡箱商盤周鼎儼作行
利圭削銳伏景光宜伸而縮圓使方外若推魯中堅強
趨新驚巧紛披猖欲辨輒止心孔傷金陵皇象劒戟張

中山夏丞鼎獨扛二碑分法古所臧隸多分少須精詳
君方妙年進莫量更入二篆君無雙近者吾甥有陳罔
昔師楊氏今頡頏見之為道安毋忘

登薊丘作

閒登薊丘望西北削諸峰轉覺天地肅因悲霜露濃雲
間何處笛日落滿城鐘自笑栖遲者惟堪學老農

題先天觀圖

聞說先天觀重重絕壁環鳥啼青嶂裏花落白雲間樵

子能長嘯居人識大還洞門無處認唯有水潺湲

和張太一秋興二首

蓬萊宮闕赤回闌龍虎神君禹步寬朝嚙日華當食穀
夜迎天仗識鳴鑾露飛仙掌金莖凍月滿玄都玉珮寒
遙想西齋清似水吟詩聽到漏聲殘

太行遙接帝王州西北連山際海稠鶴下靜依仙館夕
鴈啼高挾塞垣秋側身天地渾如寄偷眼風雲總是浮
應笑白頭京國裏長年百慮更千憂

送張真人歸上清

閉戶京城晝嬾開
初聞北觀却南回
馮夷擊鼓乘龍出
王子吹笙跨鶴來
囊裏天書明日月
匣中神劍閔風雷
回瞻魏闕紅雲擁
應在山中看蚤梅

送客省冷副使歸豫章觀省

始違山林賞復作遠遊客
忽興慈母念辭帝去京國
楊柳河上春飄然就行役
聞者為驚喜朋儔皆歎息
昔依禁樹枝今戀山巔柏
世俗更推蕩日月如有迫
歸鴈羣

響哀遙雲孤飛白都門一尊酒落景淡行色以我畱滯
心送君南征翮

三月三日奉陪憲使程公遊麻原第三谷宴藏
書山房白雲樓

明公富暇豫勝日懷登臨蹀躞驄馬行窈窕幽人心懸
崖響晴雨奔流濯春陰雲門轉絕壑畫橋貫長林拂石
慨往運聞鐘知古音耆松有百圍突嶂踰萬尋小憇釣
魚臺聿瞻華子岑捫蘿入縹緲側徑臨蕭森上有百尺

樓下有孤猿吟初筵俯層巔微風蕩危襟笑語定忘我
觥籌浩難任豈不念永畱惘然歸思深

登祝融峰贈星上人

洞庭南桂嶺北衡山連延瀟湘黑中有祝融如髻鬟嵯
峨七十二峰間祝融不自知千山萬山如迴環迴環面
面芙蓉裏儼如天仙朝紫皇千官百辟遙相望半夜每
瞻東海日六月常飛滿樹霜龍拏鳳攫熊虎擲雲生霧
滅何時極我來正值太平時況有山僧似疇昔憑高一

覽四海空草間培塿安足雄盤盤羅漢臺翕翕炎帝宮
復恐九天上視我如井中朔風日夜相騰蹙谷老崖堅
松柏禿古來鐵瓦盡飄揚山上至今猶板屋山僧勸我
歌我歌徒自傷天下五岳嵩中央此山與我俱南疆我
今三十始一見北望中原天更長

和傅與礪

近日何多念頻年不甯還河流無故道春色是他山
几看雲凭衡門罷月關無情寒與暑偏解鑄衰顏

硯山詩并序

山石出靈壁其大不盈尺高半之中隔絕澗前後
五十五峰東南有飛磴橫出方平可二寸許鑿以
為硯號曰硯山在唐已有名後歸於李後主主亡
歸於宋米芾元章刻其下述所由來甚詳宋之季
歸於天台戴運使覺民後又歸其族人宰相賈似
道求之弗與攜持兵亂間寢處與俱乃獲金大都
太乙崇福宮張真人本戴氏子今年春貽書得之

請予賦詩其辭曰

何年靈壁一拳石五十五峰不盈尺峰峰相向如削鐵
祝融紫蓋前後列東南一泓尤可愛白晝玄雲生靈霽
在唐已著羣玉賦入宋更受元章拜天台瀕洞雲海連
戴氏藏之餘百年護持不浣權貴手離亂獨與身俱全
帝傍真人乘紫霞尺書招之若還家陰崖洞壑寒谿研
宛轉細路通褰斜崑崙蓬萊與方壺坐卧相對神仙居
硬黃從寫黃庭帖汗青或抄鴻寶書秦淮咽咽金陵道

此物幸不隨秋草願君谷神長不老淨几明窗永相保
山水卷

稍稍雲木動藹藹煙峰亂遠浦引歸橈雙崖臨絕岸方
思隱淪客欲結漁樵伴水闊山更遙幽期空汗漫

送李掾自北回歸省長沙因簡趙宣慰張徵士
呂宗二判官

萬里風沙斷三湘日夜流名成親白首歲暮客扁舟黃
鵠延歸思丹楓替別愁眼穿迴處鴈心靜狎餘鷗細雨

黃陵廟殘陽杜若洲漸淡桑梓敬翻畏友朋畱送遠慚
羈旅臨分憶舊游鐘聲衡岳曙帆影洞庭秋風壤通蠻
徼煙霞拂帝丘交歌明月市傾旆壓雲樓訪菊逢徵士
行瓜識故侯為言憔悴客敝盡黑貂裘

送雷山人遊山

高人雨中至邀我遊山作自非冥寂徒孰遣紛華落方
春廼發軔殘雪猶映薄隨雲度神皋披煙望靈嶽晞沐
朝陽谷照影清冰壑淹畱皆隱淪往返必恬漠惟應樵

與牧逢時得奇藥歸來雖未期鬢髮終如昨

望葛市有懷故人盧子儀以附他舟不得上岸
相見予往赴主一書院時盧寶送予至長沙今
經其里不一造門能無憾乎至樊口作

順流無風江更急歲莫歸人浩難繫所思只隔江上邨
亂樹參差不容入憶昨扁舟涉雲夢觸熱千里能相送
我來悵望竟空還一樽知是何年共樊山蒼蒼赤壁莫
武昌對岸黃州路連聲大笑櫓如飛回頭獨送孤雲去

黃鶴山聽雨得清字

玄局息溪構虛館含餘清瀟灑松上來瑟縮花間鳴遙
兼夜柝警細與寒更并懷親感離別撫物媿生成土思
浩方殷春聲耿逾明幸及朋知好達此旦莫情北展非
窮轅南山夢歸耕何言託毫素聊與款平生

湖南憲使盧學士移病歸潁舟次武昌辱問不

肖姓名奉寄

大德七年

我本耕牧豎結廬章江涘微生屬休明世尚猶典禮驚

颺卷飛轍寥落從此始三年江漢春萬事隨逝水既昧
理生術復慚遊方旨豈無青山歸亦有桑與梓何為苦
畱滯眷眷存君子君子諒不然東臯畢耘耔

過族姪

東面雲山有草堂下臨池水即滄浪草侵古道莓苔滑
花壓頽垣薜荔香每訪所親皆異物始驚為客久殊鄉
仲容兄弟賢相映更為吾宗足感傷

銅儀

宋沈存
中所鑄

法像坤儀重來從汴水遷飛龍纏四極黃道界中天望
絕秋毫永循環太古前荒臺明月夜應有淚潺湲

重餞李九時毅賦得南樓月

娟娟臨古戍晃晃辭煙樹寒通雲夢深白映蒼祠莫胡
牀看逾近楚酒愁難駐鴈背欲成霜林梢初泣露故人
明夜泊相望定何處且照東湖歸行送歸舟去

出三洪峽

積水羣山裏行舟亂石間地偏疑隔世峽怒欲藏關獨

鳥啼深樹斜陽下急灘千憂逢一棹未覺此生孱

題邢先輩西壁山水圖

邢家蒼蒼西屋壁萬壑千峰動寒色大江忽轉天地迴
浮雲孤飛日月白參差樓觀照林紅松檜淒迷起朔風
崑崙蓬萊不可到赤城白帝遙相通賤子平生尚竒偉
南極衡湘北幽冀復從大駕卜灤京始投邢君多意氣
君昔扈從戎馬間少壯不知行路難月明飲馬長城窟
雪溪射虎祁連山萬里歸來太平日坐我江山憂百失

平明萬騎出天門又駕官車就行役

送玄上人

清江古鎮封谿道靈峰寺中玉泉好靈峰上人天上歸
親見六龍天上飛湧金門外潮來去曾是錢唐江上住
十里松風六月寒夢寐猶思徑山路自參天目老禪師
始信靈峰路不迷却被無端徵詔起等閒來往不曾知
黃河萬里從西下呂梁百步如奔馬歸去山中問玉泉
應向海門深處瀉

大駕既還獨候驛傳未得和陳真人見示

供奉關山遠淹留日月長鄉書迷楚越鄰笛亂伊涼秋
水流成字晴雲去作行寸心懸帳殿應似鴈隨陽

楚山秋晚

山人何處抱琴歸遙想樓臺隔翠微老樹風生舟正泊
空江日落鴈初飛豈無賦客能招隱亦有漁翁醉息機
一幅秋光舒復卷誰教塵土浣人衣

和歐陽南陽月夜思二首

月出照中園鄰家猶未眠不嫌風露冷看到樹陰圓
天清照逾近夜久月將遠牆東雙白楊秋聲隔窗滿

廬山連尊師求真陽詩久諾而未作也一夕夢

中得之因書以贈

此詩體要
作虞集

稽天之浸不可滅焦石之烈不可絕香鑪峰頭按羽節
滿山桃花滿湖月

十月十八日夜南郊齋宿夢先帝召見便殿手
賜橘花一枝有感而作

淚盡烏號不可攀傳宣忽降白雲間天華拜舞君王賜

夢斷齋廬月滿壇

文宗御奎章日學士虞集博士柯九思常侍從以討論法書名畫為事授

經郎揭傒斯潛著一書曰奎章政要以進萬幾之暇每賜披覽及晏朝有畫授經郎獻書圖行於世蓋有深意存焉虞嘗謂詩如三日新婦已詩如漢廷老吏揭聞之不悅故憶昨詩有學士詩成每自誇之句虞得詩謂門人曰揭公才力竭矣因答以詩云故人不肯宿山家夜半驅車踏月華寄語傍人休大笑詩成端的向誰誇并題其後云今日新婦老矣觀此詩及憶昨諸作其君臣相得之分亦可謂一時盛事也

夢兩雛

阿英十二能辟纪阿牛五歲貪讀書辟纪成縷無人織

讀書有志令人惜汝父飄零汝母休吾親雖健俱白頭
雨聲斷道風驚屋阿婆獨抱諸孫哭

大信晚泊呈舟中諸公

千家楊柳江當門東梁西梁兩岸蹲連牆大檻集日昏
撻金伐鼓海上聞小江更出采石後前人立功後人守
大信花采石酒陌上相逢莫回首

題陳所翁雙龍圖

愛龍畫壁玄淵開萬物顛倒隨雲雷龍公被髮向空下

身是真龍非畫者鐵作鬚鬚玉作鱗電出兩目雲繞身
偶然會合此何處仰面向天天不嗔世間眩轉空形影
倏忽變化那能省高僧說法夜來聽誰道相逢非夢境
牛斗蒼蒼風雨暮泉阿豈識延平路當時縱無雷煥與
張華未必終藏不飛去

元詩選初集卷三十



總校官候補中書臣吳紹潔
校對官編修臣馬啟泰
謄錄監生臣姜也魯